https://www.ssrq-sds-fds.ch/online/tei/ZH/SSRQ_ZH_NF_I_1_11_009.xml

9. Prädikantenordnung und Synodalordnung der Stadt Zürich 1532 November 6

Regest: Bürgermeister, Kleiner und Grosser Rat der Stadt Zürich bestätigen die nachfolgenden, von der Pfarrerschaft an ihrer vergangenen Synode im Beisein der Vertreter des Rates aufgestellten Artikel, zur Verbesserung von Missständen, die sich in Stadt und Landschaft ergeben haben, sowie zur Beseitigung der Unordnung. Die Artikel betreffen Wahl und Amtseinsetzung der Pfarrer (1) einschliesslich Handauflegen anstatt Ölung bei der Weihe (1.1); Vermeidung des Ämterkaufs (1.2); das Vorgehen zur Neubesetzung von Pfarrstellen und die Zusammensetzung des Examinatoren-Kollegiums (1.3); die Vorstellung neuer Pfarrer vor der Gemeinde im Beisein der weltlichen Obrigkeit (1.4) sowie die Vereidigung (1.5). Die Amtsführung umfasst die Beschränkung der Predigt auf Altes und Neues Testament (2.1); die Verpflichtung zur Verlesung der obrigkeitlichen Mandate von der Kanzel (2.2); Unterstützung der Armen und getreue Verwaltung des Kirchenguts (2.3); Kooperation der Pfarrer mit der weltlichen Obrigkeit zur Vermeidung von unmässigem Trinken, Kleiderluxus und Spielen (2.4); Ordnung für die Predigt und den Katechismus (2.5); Krankenseelsorge (2.6); Unterstützung der Pfarrer durch die Diakone (2.7); Einhaltung des angemessenen Ernsts beim Spenden der Sakramente (2.8) sowie Lebenswandel und Ausbildung der Pfarrer (2.9-10). Es folgen die Punkte zur halbjährlichen Abhaltung der Synode (3.1); Einteilung der Zürcher Landschaft in Kirchgemeinden und Kapitel (3.2); Eid der neu eingesetzten Pfarrer (3.3); Mitteilungen des Rats (3.4); Ablauf der Zensur (kirchliche Aufsicht über Leben und Lehre) im Rahmen der Synode (3.5); Amtspflichten der Dekane und Kapläne (3.6-7); Verhandlung kirchlicher Fragen und deren Vortrag vor dem Rat (3.8); Verhältnis zwischen Synode und weltlicher Rechtsprechung (3.9). Der Entwurf des vorliegenden Mandats wurde durch Heinrich Bullinger und Leo Jud im Namen der Synode an den Rat übergeben.

Kommentar: Die vorliegenden Artikel wurden im Rahmen der Herbstsynode 1532 verabschiedet und durch Heinrich Bullinger und Leo Jud am 6. November dem Rat der Stadt Zürich vorgetragen. Der Rat bestätigte diese noch am selben Tag und setzte sie in Kraft. Die Säckelmeisterrechnung vermerkt einen Betrag von 20 Pfund, der am 28. November dem Drucker Christoph Froschauer für die Herstellung von 150 Exemplaren des Mandats ausbezahlt wurde (Egli, Actensammlung, Nr. 1973, S. 870). In der Mandatssammlung des Staatsarchivs ist ein weiteres Exemplar überliefert, das einem handschriftlichem Vermerk zufolge aus dem Pfarrhaus in Elsau stammt und zusätzliche Notizen, jedoch kein Titelblatt aufweist (StAZH III AAb 1.1, Nr. 22).

Das Mandat fasst zahlreiche seit den frühen 1520er Jahren eingetretene Veränderungen, namentlich hinsichtlich Auswahl und Amtstätigkeit der Pfarrer, zusammen. Es bildet damit eine wichtige Etappe im Institutionalisierungsprozess der obrigkeitlich-kirchlichen Verwaltung nach der Reformation (Bächtold 1982, S. 35). Mehrfach neu aufgelegt, blieben seine Bestimmungen bis zum Ende des Ancien Régime im Wesentlichen unverändert in Kraft (Wälchli 2008, S. 101, Anm. 7).

Zum vorliegenden Mandat vgl. Büsser 2004-2005, Bd. 1, S. 127-142; Diethelm 2004; Bächtold 1982, S. 29-35; für die Zürcher Synodalakten vgl. StAZH E I 2; StAZH E II 1-E II 7b.

Bewilligung unnd Confirmation eines Burgermeisters unnd Ersammen kleinen und grossen Radts der Statt Zürich / über die Restitution und verbesserung ettlicher månglen und mißbrüchen / so sich by den Dienern des wort Gottes zügetragen: yetzt von dem ganntzen Synodo Zürich 22. Octobris imm 1532. jar gehalten / angesåhen und angenommen

[Holzschnitt] / [fol. 216v] / [fol. 217r]

Wir Burgermeyster und Radt / unnd der groß Radt / so man nempt die Zweyhundert der Statt Zürich. Embieten allen und yetlichen unsern Burgeren / Vögten /

Amptlüten / Landsåssen / Zůgehőrigen und verwandten / und besunderlich den dienern / so den Gemeinden und kilchen Gottes / zů verkündung sines heyligen wordts / und rechter waarer Christenlicher leer / in unser Statt und Landschafft fürgestelt / was nammens / stands / wåsens oder wirdigkeit die yemer sind / unsern grůß unnd geneygten willen / mit erfordrung schuldiger und Christenlicher gehorsamigkeit. Und fågend üch darby zůvernemmen. Demnach der erbfygend unsers heyls / dasselb zehinderen nie gerůwet / sunder allweg die warheit / und den rechten waaren Gottgeselligen Gotsdienst / nit allein yetz by unseren zyten / sunder so dickest die wålt ye bůß und besserung / und sich Gottes willen zenåhern angenommen / mit etwas unmaassen unnd mißordnungen zeundergraben unnd zůverdungklen understanden.

Deßhalb die gemelten diener der Christenen gemeinden / diewyl etwas mångel und unordnungen yngerissen / uß schuldiger trüw bevolhens ampts / inn bysin / ouch mit hilff und aunst unserer darzů verordneter Radtsfründen / sőllich / ouch künfftig mångel und gepresten damit zůverbesseren und zůfürkommen / zů meererem ufwachs gûter Christenlicher sitten und tugenden / ouch bekeerung unsers sündtlichen lebens und versunung Göttlichs zornns / inn yetz gehaltnem gemeinem Synodo / diß nachvolgend erbar göttlich Artickel / Restitution und verbesserung uff wyter unser gfallen uß gutem yfer / mit bystand unnd grund heyliger göttlicher gschrifft angesehen / geordnet / inn gschrifft verfaßt / und uns die zuverwilligen und zubestäten / hüt datum fürbracht. Und so dann all unser gemůt und fürnemmen / syd bekannter warheit har (bezügen wir an Gott) allweg und noch dahin gereicht / das wir vorab Gottes Eer / sin ewige warheit / und damit ein fromms erbars Gottseliges leben by und under den unsern / gefürdern und züchten / und die Gottverletzlichen laster abstellen möchten. Und wir in uns anders nit finden können / dann das sollich nachvermerckt Christenlich ordnung und verbesserung Göttlicher gschrifft und war-/ [fol. 217v]heyt gemåß / mit selben begründt / ouch zů ufnung unnd pflantzung eines göttlichen Christenlichen läbens / hoch dienstlich syge.

So haben wir sy uns gfallen lassen / mit gûtter vorbetrachtung und wolerwegnem radt / gunst und willen daryn geben / unnd sy uß ordenlicher Obergkeits macht bekrefftigt / confirmiert / und beståtigt. Wellend und gebietend ouch daruf zum ernstlichsten gemelten Dienern deß wordts / unnd sunst allen denen / so inn unser Statt gerichten und gebietten wonhafft / und die dise ding belangen sind:

das sy söllich gütt erbar Ansehungen / Ordnungen / und Christenlich Artickel haltind / daby belybind / denen strax und styff gelåbind und nachkommind: ouch darwider nüt thügind / redind / noch handlind / so lieb inen Gottes und unser huld syge / unnd sy unser schwåre straaff vermyden wellind. Dann sölte sich yemands fråfler wiß hiewider setzen / und disem frommen fürnåmen nit gelåben / der wurde empfinden / das wir darab schwår mißfallen / unnd zur

straaff billich ursach gehebt hettind. Deß wellend wir mångklich hiemit gewarnet. Und damit die erhaltung diser und anderer Christenlichen Ordnungen dem gwaltigen allergůtigsten Gott / und sinem fürgeliebten Sun Jesu Christo / dem es alles zů gefallen beschicht / darzů uns und üch / inn sein göttlichen schütz und schirm demůtigklich bevolhen haben. Erkennt und in Truck verfertgget / des vi. tags im Wyntermonet. Anno / etc M. D. XXXII.

Und lutet die gemelt Restitution und verbesserung von wort zu wort als hårnach volgt. / [fol. 218r]

Ghein fryheyt wåder geistliche noch wåltliche mag noch kan nit durch göttlich rechtmåssig ordinantzen gefangen / verhindert oder undergetruckt werden.

Dann die fryheit eins frommen Christen menschen nit der aart ist / das sy begåre von dem gûten waaren und erberen gefryet sin. Diewyl sy von dem bösen unordenlichen fry / und des gûten eygen sin / die råcht fryheit achtet. So dann ein göttlich erber an såhen / nützid dann zucht und alles gûts pflantzt / mögend kein recht måssig ordinantzen mit dem tittel der fryheit abgeschupfft werden.

Sunder es soll bevor bybracht werden / das das ansåhen an imm selbs ungöttlich und unbillich sye. Da wir uns yetz dan bevor behaltend / wo es mit Gottes wort erfunden / das einer oder vil artickel unsers volgenden ansåhens / unbillich / und dem wort Gottes zewider wåre / der oder die nützid gålten / und nach der warheit söllind gebessert werden. Damit die waar fryheit / gar mit geheinem menschlichen ansåhen getrångt werde.

[1] Vonn der waal / senndung / unnd hånduflegen der Predicanten

[Marginalie am rechten Rand:] Jeremie 2

[Marginalie am rechten Rand:] 2. Corinthos 10

[Marginalie am rechten Rand:] Acta Apostolorum 13

[Marginalie am rechten Rand:] 1. Timotheus 4

[1.1] Diewyl das pfarr oder predigampt das höchst unnd notwendigist inn der kilchen Gottes ist / und aber bißhar groß mangel und pråsten inn der beruffung / waal / und sendung gewäsen: habend wir für das erst von einer verbesserung red gehalten / angesåhen / das uns Gott nit allein bevelch abzebrächen / sunder ouch ufbuwens gegåben hat. Darumb so mit Gottes wort die Bischofflich wyhe / ölung und Character abgethon / ist das nåchst / das wir das hend uflegen / nach dem bevelch des Herren und Apostolischen bruch / an des ußgerüteten Bischoflichen mißbruchs stat / ynpflantzind: welches mit volgenden mittlen angesåhen.

[Marginalie am linken Rand:] Hebreos 5

[1.2] Und so nun Paulus spricht / Niemands mißt im selbs die eer oder / [fol. 218v] verwaltung zů / sunder der von Gott berůfft wirt / wie Aaron: ouch inn den Epistlen an Timotheum und Titum / vil hoher gaaben inn dem Pfarrer fordert: ist gar nit göttlich noch billich / das / so ein Pfarr ledig worden / ein

yeder louffe / båttle / gyle / gaaben verheysse unnd gåbe / die underthonen anfåchte / parthen an sich håncke / gantz schaaren fürbitter mit im fåre: und da im die pfarr uß ansåhen gunsts / früntschafft / lyplicher diensten / oder gaaben / verlihen werde. Dann damit åben als übel gesündet wirt wider Gott und die waarheit / als do der Romisch hof sin Curt åbt / und uff die pfarren die satzt / die im gefielend / und die er vereeren wolt / die doch nit zun Pfarreren geschickt: dardurch aber das gantz volck verderbt und gar verfårt ist.

[Marginalie am linken Rand:] Jeremie 23

[Marginalie am linken Rand:] Acta Apostolorum 2

[Marginalie am linken Rand:] Ezechiel 13

[Marginalie am linken Rand:] Johannes 10

Sömliches fürohin abzestellen und ze verkummen / sind wir desse uß Gottes wort einß worden: das wo sömlicher unbill und vorteil / wider Gottes ordnung gebrucht / und yemands erfunden / der selbs gelüffen / sölle der selb billich mit Simone dem zouberer zu sömlicher göttlicher verwaltung nit zugelassen werden. Deßhalb das er das hoch geistlich ampt nid anders geschetzt / dann das es im umb gällt / gunst unnd fürschub werden sölte / das er sinen buch damit spyßte / und nit achtet ob er zu diser verwaltung berufft / begabet unn geschickt sye / oder wie er die schäfly Gottes wyden wölle und möge.

[1.3] Wenn aber ein pfarr ledig wirt / soll dannethin der Decanus / inn deß Capittel die pfarr gelågen / einer ersammen obergheit des pfarrers tod antragen: ouch erfaaren und bericht gåben / wer der Låhenherr sye: damit man fürderlich einen anderen pfarrer der kylchen fürstelle: ouch niemands mitthinzů nützid an siner fryheit und geråchtigkeit abbrochen werde.

5 [Marginalie am linken Rand:] Examen.

[Marginalie auf der nächsten Seite:] 1. Timotheum 3

Und so dann yemands von dem Låhenherren fürgestelt / oder unseren gnedigen herren / da sy nit Låhenherren / fürzestellen vergünstiget / soll der oder die so fürgestelt / iro leer und låbens halben flyssig ersücht: und das sömlichs fügklich beschähen möge / ein bestimpter tag examinis / hie inn der Statt Zürych / angestelt weden: dahin die vilgenampten fürgestälten ire manrächt oder kuntschafft ires harkummens und låbens bringind: Damit nit etwan harverlouffen / [fol. 219r] ufrürig / meyneyds und verlümbdet lüt / die anderstwo iro übelthat halben vertriben / hie unbedacht und unerfaren / an sömliche göttliche åmpter gesetzt werdint: dero schand hernach zů schmaach deß heyligen Evangelij reyche.

Und nach dem dann die kuntschafften von Examinatoribus erlåsen / soll dannethin einer nach dem andern examiniert werden: es sye dann sach das einer vor bekant / probiert / und examiniert sye / denocht soll er sich uff den tag Examinis erzeigen. Und wie man denn einen yeden findt: also soll es in einen brieff gestelt / verschlossen / und einem ersammen Radt überschickt werden

/ das er da nach gstalt der frommgheit und gschiktligheit eines yeden handle und waal name.

Wenn aber die waal imm Radt soll fürtragen werden / söllend die Examinati / so inn brieff gestellt / für den ersammen Radt keeren / dem ouch ire mannträcht oder kundtschafft fürlegen / sich allein anzeigen / und nit bitten / noch fürbitt mit inen füren: damit die waal fry / und nit nach gunst beschähe: also die kilch mit frommen / geleerten / und gotsförchtigen dienern versähen werde.

[Marginalie am rechten Rand:] Examinatores.

Hie ist aber ouch das billich / das unser Gnådigen Herren den Examinatoribus by iro eyden befelhind zum trülichsten on alle gfaar allein Gottes eer und der kilchen nutz angesåhen ze examinieren. Item das dz examen fürnåmlich also gehalten werde / das man für das erst Locos communes religionis anzühe. Demnach erfare wie belåsen und geůbt die fürgestalten inn beyden Testamenten syend: was sy für ein iudicium in Scripturis habind / wie sy die bruchind / låsind unnd dem volck erklårind. Und das darzů verordnet werdind zwen von den Predicanten / zwen von den Rådten / und zwen von den Låseren der heyligen geschrifft.

[Marginalie am rechten Rand:] Fürstellen der Predicanten.

Nach dem aber das Examen beschåhen / die zügknuß für Radt gefertiget / die waal geoffnet / und yetz dann einer zum Pfarrer verordnet / wil inn vil wåg nit gebüren / das er grad hinlouffe und anstande: sunder im soll einer von einem ersammen Radt / oder der Vogt deß selben orts züggåben werden / unnd uf den nåchstvolgenden Sontag inn die Pfarr keeren: dahin söllend ouch der Decanus deß / [fol. 219v] selben Capittels / und der nåchst Pfarrer / kummen. Unnd so dann das volck versammlet / soll der so von einem ersammen Radt verordnet die waal der kilchen offnen / und ermanen / ob yemands da sye / der etwas lündens unnd unredlichs uff den erwölten wüsse / sölle das offnen.

[Marginalie am linken Rand:] Acta Apostolorum 13

[Marginalie am linken Rand:] Acta Apostolorum 20

[Marginalie am linken Rand:] 1. Timotheum 4

[Marginalie am linken Rand:] 2. 17

[Marginalie am linken Rand:] 1. Timotheum 5

[1.4] Und so sich dann nützid erfindt / ouch kein klag ist / soll der Decanus predgen / fürnemlich was des Pfarrers ampt / und wie sich die kilch mit und gågen im halten sölle / etc Unnd nach der predge stelle er den Pfarrer der kilchen für / und språche zů im / Sich lieber brůder / dise biderbe gemeind befålhend wir dir mit den worten Pauli / Hab gůt acht uff die gantze hård / über die dich der heilig geist zum wåchter und hirten gesetzt hat / zeweyden sin volck / das er mit sinem eignen blůt an sich erkoufft hat. So biß inen ein vorbild imm wort / imm wandel / inn der liebe / imm geist / imm glouben und luterkeit: unnd Gott verlyhe dir sinen heyligen geist / das du wie ein getrüwer diener sines

herren / handlist / inn dem namen Gottes. Und damit lege er im die hend uff. Demnach ermane das volck umm gnad anzeruffen. Aber nach vollendetem gebätt / bevelhe der Vogt oder Radtsbott den Pfarrer der Gemeind inn namen der Christenlichen obergheyt. Das sy in bevolhen habind / im beholffen und beradten syend zu allem dem das sin ampt betrifft / nit beleydigind. Ob er dann nit handlete das geschickt / nit von einem yeden gepalget / sunder der ordenlichen Obergheit angezeigt / die in nach gebür straaffen: glich wie sy ouch gheinen unbeschulter sach / sines ampts entsetzen wölle: ouch nach luth und sag der letsten verkumnuß zwüschen Statt und land.¹

[Marginalie am linken Rand:] Galathas 2

[Marginalie am linken Rand:] 2. Timotheum 4

[1.5] Uff somlichs wo er noch den Eyd im Synodo nit gethon / soll im denocht uff trüw unnd glouben zepredgen vertruwt werden: doch das er in dem nechstkünfftigen Synodo schweere.

[2] Vonn der Leer unnd låbenn der Predicanten

[Marginalie am linken Rand:] Die Leer.

[2.1] So dann ouch unmaß / und allerley unordnung in dem predgen und leeren von etlichen gebrucht: daruß aber vil ergernuß / unwillens und unradts volgt: ouch die an den anstössen mee von dem predgen / [fol. 220r] verwildet / dann herzu gebracht werdint / habend wir uns eigentlich erinneret deß bevelch Gottes und eyds den wir thund / allein nuw und alt Testament zepredgen / und was darinn grund hat. Deßhalb wir ouch abgeredt / das niemands im selbs ettwas erst erdachts / mit stuckwerch unordenlicher und unnötiger matery fürnäme: sunder das im ein yeder uß Biblischer geschriftt das siner kilchen gmåß und notwendig ist erwölle / das fürtrage / interpretiere / daruß leere / ermane / tröste und straaffe: und das alles mit geist / ernst und truw / ye das hierinn unnser fleischliche anfächtung nit gespürt: oder das wir söliches / mit so ungebürlichen / lychten / unzüchtigen / schalckhafften schmütz oder spitzworten thugind / das einfallte biderbe lüt abgeschreckt / unwillig / und die warheit selbs verdacht / lycht / oder verhaßt gemacht.

[Marginalie am rechten Rand:] Straaffen.

[Marginalie am rechten Rand:] Ir sind das saltz der erden.

[Marginalie am rechten Rand:] 2. Timotheum 2.4

Nit das darumb die mißbrüch / aberglouben / sünd und laster nit söllind dapferlich ye nach gestalt der sach und gelågenheit der lastern oder lasterhafften / mit ruhen / doch gschrifftmåssigen worten / angetaast und bescholten werden. Dann wölcher wölte den für ein predger der waarheit halten / der aller valscher religion / allen lasteren und lasterhafften verschonte / klüßlete unnd zentzlete: Sunder wir wellend hiemit ein maaß bestimpt haben / und das alle ding mit dapfferem ernst / nit mit låcherlichem gspey / schmützen / schimpffen und spåtzlen

beschähind: ja das die warheyt selbs / die lütere unnd klåre der håndlen / mee tringe / zühe und überwinde / dann das unbegrünt / geschrifftloß håderig balgen: Dann nützid sterckers / dann die warheit ist. So ist ghein ander ding das mee berede und überwinde / dann hålle gutte ordnung / unnd so man ein ding mit trüw / liebe und ernst darthut. In summa: es soll sich ein yeder also inn handel schicken / das all unser leer und straaff zu ufbuwnuß und eeren Gottes beschähe: damit wir vil menschen Gott und der gerechtigkeit gewünnind.

[Marginalie am rechten Rand:] Die Mandata.

[Marginalie auf der nächsten Seite:] Exodi 20

[Marginalie auf der nächsten Seite:] Jeremie 17

[Marginalie auf der nächsten Seite:] Acta Apostolorum 13

[Marginalie auf der nächsten Seite:] Collossos 3

[Marginalie auf der nächsten Seite:] Romanos 12

[2.2] Deßglych ist abgeredt / das die Mandaten so von unsern herren wider unmaß und laster ußgangen / vil an den Cantzlen angezogen werdind / wie es sich dann ye mit dem Text zůtreyt / damit das volck zů zucht / friden / und gehorsamme ermanet / der lastern nit nun der vorcht halben / sonder ouch von liebe Gottes wågen abstande. / [fol. 220v] Deßhalb soll ouch nit vergåssen werden / das ein yeder jårlich / nach unser herren bevelch / die ordnung wider kupplen / hûren / eebrechen / und derley laster fürlåse.² Item kriegen / spilen / Gotslestern / und zůtrincken / ouch unmaaß in kleyden / und andern stucken / mit dem wort Gottes / und ußgangnen Mandaten³ weere. Deßglych das ein yeder die sinen ernstlich zu dem kilchengang ermane / das doch der Sabbath gehalten / und Gottes wort nit so gar verachtet werde. Item das man sich vor allem valsch / liegen und vertragen goume / inn richten / lyhen / und kouffen nit verrücht sye: was man schuldig ist / bezaale / niemands nützid veruntrüwe / recht gwicht und maaß habe und gåbe. Dann gemelte stuck nit minder / dann das Bapsthůmb zůbeschålten und zuverwerffen sind: und so vil ernstlicher / sovil schådlicher sy ynbråchind.

[Marginalie am linken Rand:] Die Armen

[2.3] Und so uns die Armen von Gott in sonders bevolhen / habend wir wyter einandren ermanet / das ein yeder uß mitlyden / die / siner kilchen ernstlich mit Gottes wort fürstelle: in sonders deß kilchen gůts vil gedencke / wie man es bruchen sölle. Daby von einet ermanen / das man getrülich damit umbgange: wie ouch inn unser herren mandat jårliche råchnung bestimpt ist: damit wir uns nit übel ann den Armen wider Gott versündint / und die kilchengůter größlicher dann der Bapst / München und Pfaffen mißbruchind.

In summa / das sich ein yeder fürohin mit der leer flysse / nit nun die abgethonen mißbrüch zebeschålten oder da uß zebehalten / das sy nit widrumb kummind: sunder ouch Göttlichers und das besser ist / an des hingethonen mißbruchs stat / zestellen. Also das wie wir vorhin die Götzen / stein und holtz

bekleydt / geziert / und mit opffern und anderen kostlichen gaaben vereeret: das wir uns yetzund über die låbenden bilder Gottes / über die Armen erbarmind / die bekleydind / spysind und haltind / wie Christus Matthåus am xxv. bevolhen. Wie wir vor der Måß nachgelouffen / das wir yetzund das wort Gottes liebhabind / dem nach haltind / und uß dem selben die frucht des lydens Christi råcht leerind verston: damit man ouch das Nachtmal Christi mit waarem glouben / råchter dancksagung begange. Item wie wir vor unser heil und fromgheit uff die Ceremonien und usseren schyn gegrünt: das wir yetzund uff Gott allein / [fol. 221r] gründint / unnd den mit glouben / liebe unnd unschuld vereerind. Item wie wir vor inn der unordnung gehorsam gsin: also yetzund der warheit und erberen gutten gsatzten nit widerstråbind / etc.

[Marginalie am rechten Rand:] Straaff der Laastern.

[2.4] Und das hie das volck gebåtten / und mit Gottes wort genötiget werde ir unråcht unnd ungehorsamme zeerkennen: fürnemmlich aber in Stetten die Rådt / und uff dem Land die Ober und Undervögt / ouch die Elteren in den Kilchhörinen gar trüwlich und ernstlich ermanet ufzesåhen: damit doch die laster nit so gar überhand nåmmind / sunder nach der leer Christi Matthåus am xviij. mit warnen / oder so das nit hulffe / mit straaffen abgethon / und damit zucht und gehorsamme gepflantzt werde.

Hierumb bitten wir ouch unsere gnedige herren zum höchsten und umb Gottes willen / das sy hie in iro Statta mit den verordneten / und uff dem Land mit iro Ober und Undervögten / mit ermanen oder bevelch verschaffind / das die gemelten Mandaten zu der eer Gottes trüwlich und redlich gehandthabt. Und welche dann dapffer und rechtmässig nach warheit und ußgangnen Mandaten handletind / das sy die schützind / schirmind / ouch inen fuß haltind. Dann sol das trincken / zeeren / spilen / suffen / unmaaß in essen und kleidern fürgon / zunämen / unnd nit abgestelt werden / ist zesorgen / das uß uns nützid werde / dann ein verhergt volck / das all sin hab liederlich verthon / yetzt umb gålt feyl / ouch wir einandern vor armut nützid werdint halten / ja gar nit bezaalen / betriegen / und mit tåglichem zanggen / rächten / und ufrüren zenüty machen.

Das nun alles one zwyfel wol damit mag vermitten werden / wenn man zů allen jaren / oder so man sust uff dem Land zeschweeren pflågt / die Mandaten (wie ouch vornaher gebrucht) måldete und ernüwerte;⁴ ouch den fürgesetzten und verordneten eltern in den Gemeinden by iro eyden ynbunde / sorg zetragen / die übertretter mit trüwen zewarnen / und so ghein früntliches nützid beschusse / anzezeygen / damit das überfaren unnd ungehorsamme nach verdienst gestraafft

[Marginalie am rechten Rand:] Ordnung des predgens und båttens.

[2.5] Inn der ordnung aber des predgens / habend wir ouch das ein- / [fol. 221v] mutigklich angesähen / das alle und yede Pfarrer alle Sonntag inn iro pfarren einist am morgen vor mittag predgind: und uff die predge die allgemein form

deß gebåtts / so uns Christus Jesus Matthåus am vi. geleert / vormeldint: daruff ouch den Decalogum / die gebott Gottes uß dem ii. bůch Mosis xx. capitel unnd zeletst die Artickel unsers waaren Christlichen gloubens vorspråchind. Damit diese drü stuck / das Gebått / die Gebott / und der Gloub / dem gemeinen menschen wol ynbildint.

[Marginalie am linken Rand:] Kinder zucht.

[Marginalie am linken Rand:] Luce 18

[Marginalie am linken Rand:] Deuteronomium 6

Item das die uff dem Land ouch all Sonntag umb die drü / wie man vornaher die vesper gehebt / yetz dan gemein gbått und predge haltind / und die für die dienst unnd das volck das morgens vor gschäfften zur predig nit kummen mag: in sunders aber für die jugend / die in sonders Gott geeignet und zů zucht und frommkeit sol uferzogen werden. Dorumb ist abgeredt / das diser stund meerteils söll Catechismus gehandlet / unnd einfaalt was der gloub / welchs die Artickel des gloubens / was gebåttet / unnd wie man båtten sölle: Item welchs die gebott Gottes / und was ir innhalt und verstand sye / erkleert werden. Das nit ettwann verrüchte mennschen funden / die wåder des gloubens noch gebåtts / unnd wie sy joch låben söltend / bericht syend: also ouch unwüssend zů dem Tisch des Herren gangind: sunder das ein yeder vorhin denocht bericht / wüsse was er handle / und fürohin thůn sölle.

Doch in disem allem ist yeder kilchen heimgesetzt / welche stunden hierzů am allerfüglichsten erwölt: so ferr das der Catechismus uff die Sonntag geübt werde. So ist allen denen vergünstiget die Filialen und deßhalb ferr unwäg habend / das sy den Catechismum zu Monaten einist mit flyß haltind / und das nit übersähind.

[Marginalie am linken Rand:] Fürbitt.

[Marginalie am rechten Rand:] Die todten.

Das ouch nütdisterweniger in der wochen zemol einist ein predig und gemein gebätt für alles anligen der kilchen Gottes: wie es yetzund ouch hie in der Statt am sibenden Octobris [7.10.1532] täglich zevolfuren angesähen⁵ / gehalten werde. Deßglych die tag der heyligen Apostlen unnd andere wie sy von unsern herren bestimpt / mit predgen wie von alter har versähen. / [fol. 222r] [Marginalie am rechten Rand:] Heimsüchen der krancken.

[2.6] Und sydmal der vynd unsers heils den menschen nimmer grusammer ansicht / dann inn der kranckheit und stund des todts: deßhalb der mensch nimmermee trosts underricht und sterckung / dann imm todtbett bedarff: habend wir unns erinnert der leer Jacobi am v. das fürohin ein yeder Pfarrer die sinen (wo man anders sin begårte) besüchen / die krancken trösten und berichten sölle / båtten / und von verzyhung / von dem erlösen Christi / von der urstendy und eewigem låben reden / das sich die krancken dultigklich inn willen Gottes ergåbind / und fürohin der zytlichen dingen vergessind / etc.

[Marginalie am rechten Rand:] Acta Apostolorum 8

Deßglych das ein yeder sin kilchen ermaane / das man die krancken besüche / die werck der barmhertzigkeit erzeige / sy tröste / inen beholffen und beraten sye. Und so sy abgestorben / mit zucht und Christenlicher demüt / als mitgnossen der urstendy Christi / eerlich bestatte: und die demnach (wie bruch ist) der kilchen verkünde / etc

[Marginalie am rechten Rand:] Diaconi.

[Marginalie am rechten Rand:] 1. Timotheus 3

[2.7] Hierzů sőllend fürohin alle Diaconi / so sy vonn den Pfarreren gefordert / beholffen sin / es sye dann mit predgen / zůdienen der Sacramenten / mit heimsůchen der krancken. Es ist ouch luter abgeret / das niemands fürohin yemands ungeordneten und unbekannten / dem volck an die Kantzlen fürstellen sőlle: damit das ouch hie dem Evangelio ghein nachteyl entstande.

[Marginalie am rechten Rand:] Kilchendienst / und zudienen der Sacramenten.

[Marginalie auf der nächsten Seite:] 1. Corinthos 12

[Marginalie auf der nächsten Seite:] Die Ee beståtten.

[2.8] Wyter habend wir ermåssen / das tråffenlich nottwendig sin wil / das alle diener des worts unnd der kilchen / grossen ernst inn den diensten der kilchen gebruchind. Dann so die Diener one ernst iro ampt verwaltend / ist ghein wunnder ob schon ouch das volck nit nun die Diener / sunnder ouch die heiligen ding selbs verachtet. Dorumb wenn die kilch zesamen kumpt / die predig zehőren / unnd zebåtten: so flysse sich mengklich des ernsts: das / wie das wort der warheyt ein ernst ist / also ouch des Dieners wanndel ernsthafft sye. Ouch das das volck vom schwätzen zum gebätt gehalten werde. Ouch imm zu dienen der heyligen Sacramenten / die leer und das zudienen gemäß sye hoher heiliger geheimnuß. Nit das man von den Sacramenten rede / wie von gemeinem zeichnen: und demnach den Touff gåbe / samm man one geheimnuß die kind mit gemeinem wasser begiesse. Oder also das Nachtmal Christi zůdiene / / [fol. 222v] samm man sunst gmein brot und wyn åsse und trincke: sunder es ist billich das man mit der leer / in sonders / wenn man dz Nachtmol begon wil / ouch sust wenn es sich von Sacramenten zereden begibt / eigentlich erklåre / das mengklich die hohen geheimnuß unnd heiligen pflicht der Sacramenten verstande / unnd dannethin mit glouben / ernst / und råchter andacht sy gebruche / in sunders Gott umb gnad bitte / und umb syne gutthaten dancksage. Dann die Corinther mit tod und kranckheyten gestraafft wurdint / das sy das Nachtmol Christi nit inn der wirde hieltind / inn dero sy es billich gehalten håttind. Und so der Bapst zevil daran gethon / und gestraafft worden / wirt ouch Gott uns nit verschonen / wenn wir die Sacrament zevil verkleinern / und nit recht bruchen wurdint.

Darumb gedenck ein yeder das er nach abgethonem mißbruch / ghein annderen mißbruch / sunder den rächten bruch / nach vermög der gschrifft / rächt und wol ynpflantze. Deß glych ouch mit dem ynfuren und beståten der Ee ernst bruche / damit die heilig ordnung Gottes unsers lychtfertigen diensts / by den einfallten / nit in argkwohn kumme: sunder wie die formen zebåtten / die Ee zebeståten: ouch die Sacrament den Touf und Nachtmol Christi zu zedienen / uß der gschrifft gestelt / den ernst und geist der gschrifft herfür tragend: also wir ouch gedenckend / das wir der gschrifft und geist Gottes diener sind. Hie ist ouch eigentlich beschlossen / das / irrung unnd spån / ouch valsch zevermyden / gheiner unerloubt dem anderen die sinen ynfuren sölle.

[Marginalie am linken Rand:] Låben und wandel der Predicanten.

[Marginalie auf der nächsten Seite:] Matthåus 8

[Marginalie auf der nächsten Seite:] 1. Timotheus 3

[2.9] Also könnend wir ouch wol erkennen / das nützid grössere verachtung der Predicanten gebirt: dann so sy sich selbs mit unordenlichem wandel befleckend und ze nüty machend. So aber die verachtung der Predicanten zů verkleinerung der predigy reichen wil / ouch gantzer kilchen Gottes ergerlich unnd schådlich ist / wenn die Pfarrer inn unmaaß / trunckenheit / üppigheit / unzucht in worten / wysen und geberden verschreyt / oder dero mittgsellen / die inn obernempten unrådten verargwhont sind: ouch mit kleidung / weery / unnd anderem usserlichem wandel sich der maassen gstaltind / das man ein lycht üppig gmut ann usseren zeichen spüren mag: habend wir uns hie uß hochanligender not entschlossen / wöllend ouch die / so hierinn villycht verhafft und verargwohnt / zum thüristen ermant haben / das sy sich fürohin der stucken måßgind / der offnen ober/ [fol. 223r]nempten verergerenden lastern abthugind / die Wirtzhüser und gesellschafften (welche nit in sonders ze eeren dienend) gantz und gar vermydint: in summa / das sy sich also mit reden / wandel / kleydung / und weery gestaltind / das es unserm beruff und ampt gemåß / und yedem unverwyßlich sye / ouch schynbarliche verbesserung in nåchst künfftigem Synodo spüre. Dann treffenlich groß ist das wort des Herren / Ir sind das saltz und liecht der menschen. Also soll üwer liecht lüchten / das die menschen üwer gute werck såhind / und Gott prysind. Und das der heilig Paulus geredt / der Pfarrer sölle heilig sin / ein züchtig fromm hußgesind haben / unnd eins unstråfflichen wandels sin.

[Marginalie am rechten Rand:] Studium und übung der Predicanten.

[2.10] Das ouch kein mangel und gebråst ann Christenlicher leer uß unberichte ungeleerte oder unwissenheit gefunden / sunder das ein yeder geschicklich / gewüß / klar / ordenlich und mit vernunfft das wort Gottes der kilchen fürtrage / habend wir eigentlich abgeredt / das sich mengklich / so ferr und im lybs nodt müglich / der usseren hand arbeit entschlahe / aller usseren gewårben sich entzühe / und sich einig uff das anruffen zu Gott / für sin volck / und demnach uff das låsen und empsig studieren begåbe: angesåhen das wir sömlichs in dem byspil der heiligen Propheten un Apostlen erleernt: und das Paulus von dem

Pfarrer forderet / das er also bericht unnd beredt sye / das er mit gsunder leer / leeren und ermanen / deßglych die widerfåchter überwinden / und iro valsch ans liecht herfür zühen möge. Welches alles nit one besonderbare gnad Gottes / träffenlichen ernst / und grosse übung erlangt wirt. Dorumb dann grosser flyß notwendig ist: in sunders / so wir fürnemlich mit der lybs narung dorumb erhalten werdind / das wir der leer unnd aller kilchen händlen dister baaß gewarten mögind.

[3] Vonn demm Synnodo und wie der gehalten

[Marginalie auf der nächsten Seite:] Wenn die versammlung gehalten.

[3.1] Damit aber diß oberzelt ansåhen dister baaß erhalten / ouch zucht / einigkeit / råchtmåssige ermanung und straaff under den Dienern des worts blybe: alle simulation und ambition vermitten und / [fol. 223v] ußgeschlossen werde / soll jårlich ein allgemeiner Synodus zwey malen hie inn unser herren Statt Zürich besammlet werden. Des ersten uff nåchsten Montag nach dem Meytag [1. Mai]: unnd zum anderen uff den nåchsten Montag nach Galli [16. Oktober]: und ob dann die zwen tag uff den Montag selbs vielend / so ist der volgend Montag bestimpt / das mengklich hie zů abind sye: damit man morndes zů gůter zyt anhebe. Hie soll ouch niemands ußblyben / one merckliche ursachen / die er sinen nåchsten mitpfarreren anzeigen. Unnd by disen bestimpten tagen soll es fürohin one wyters beschryben und berůffen blyben. So möchtend ouch die zyten so růwig werden / man wurde sich ze jar mit einem Synodo vernůgen lassen

[Marginalie am linken Rand:] Presidenten.

In disem Synodo söllend zwen Presidenten verordnet werden: einer von den Predicanten / und einer von den Rådten: welche die anfrag habind / berüffind / ußstellind / anbringind und handlind. Wir bittend ouch unsere herren / das sy uns noch siben man uß iro Rådten verordnind / die by allen håndlen sitzind / uns beradten und beholffen syend.

[Marginalie am linken Rand:] 1

[Marginalie am linken Rand:] Ordnung des Synodi.

Der Synodus aber ist fürohin also angesåhen. Erstlich soll man Gott umb gnad anruffen / damit man da von siner eer / unnd der kilchen heil mit ernst handlen / niemands beschwåren noch verforteylen / die warheit finden / und die yrrigen widerumb an den råchten wåg bringen möge. Das die warheit erhalten / zucht unnd alle gottseligkeit råcht gepflantzt werde / etc

[Marginalie am linken Rand:] 2

Demnach låse man aller Pfarren naamen / damit man vinde welche gehorsamm / und welche ungehorsamm erschynen.

[3.2] Und sind die Pfarren also ußgeteylt unnd zů Capitlen verordnet volgender gstalt.

Zürich	
Das groß Münster Die Lectores S. Peter / sin Diacon Frowenmünster / sin Diacon Spital. Die siechen ^b Zollicken Schwamedingen Ryeden / [fol. 224r] Wytticken Alltstetten	5
Der See	
Ståfen Humbråchtingen Månendorff Meylen Küßnach, Herliberg, Erlibach Richtischwyl	15
Wådischwyl Horgen. Hirtzel	20
Dallwyl ^c Kilchberg ^{d e f}	20
Das Fryampt	
Cappel Husen Knonow Maschwanden Rifferschwyl	25
Måttmenstetten Ottenbach Affhollteren Hedingen Bonstetten Stallickon	30
Birmensdorff	35
Steiner capitel Stein ^g Stammheym Ossingen	

Trüllickon

Martelen

Louffenh

Winterthurer capitel

Winterthur. Predicanti

Oberwinterthur

Dåß

Rickenbach

Dynhart^j

10 Alltickon

Dorlickon

Söützach

Nåfftenbach

Hettlingen

15 Andelfingen

Tågerlan

Hengkhart

Berg

Flaach

20 Embrach

Lufingen

Rorbiß

Dåttlickon

Pfungen

25 Brütten

Velthen

Wülfflingen

Bůch

Elgőwer capitel

Ellgőw

Aelsow

Wysedangen

Schlatt

Tzell

 $_{35}$ Durbentaal k

Wyla

Wetzikommer capitel / [fol. 224v]

Gruningen

Gryfensee

Pfåfficon. Diacon	
Kyburg	
Alltorff	
Yllnow. Diacon	
Rußickon. Diacon	5
Wyßling	
^l Lindow	
Wangen	
Schwertzenbach	
Důbendorff	10
Vållanden	
Muur	
Uster. Diacon	
Folckenschwyl	
Seegråben	15
Wetzickon	
Oetwyl	
Hinnwyl	
Wald	
Bårotschwyl	20
Dürten	
Vischental	
Rüty	
Goßow	
Egg	25
Bůbickon.	
Reginsperger capitel	
Hỗngg	
Wyningen	
Rågenstorff	30
Dellickon	
Otelfingen	
Buchs	
Dielstorff	
Wåningen. Diacon	35
Steinmur	
Stadel	
Bülach	
Niderhaßlach	
Oberglatt	40

Rümmlang Kloten Basserstorff Eglisow Glattfelden Wyl Rafftz.

[Marginalie am linken Rand:] 3

[3.3] Dannethin beruffe man die noch nit geschworen habend / das sy unsern herren den gemeinen Eyd Synodi schweerind. Aber die form des Eyds ist dise.

Das ich das heilig Evangelium und wort Gotts / darzů ich berůfft bin / trüwlich und nach råchtem Christenlichen verstand / ouch nach vermőg Allts und Nüws Evangelischen Testaments / lut miner herren von Zürich vorußgangnen Mandats / leeren und predgen / und darunder kein dogma und keer / die zwyflig und noch nit uff der ban und erhalten sye / nit ynmischen / sy sye dann zevor gmeiner ordenlicher versamlung / so jårlich zwey mol gehalten / anzeigt / / [fol. 225r] und vor der selbigen erhalten. Darzů soll und wil ich einem Burgermeister unnd Radt / ouch den Burgeren / als miner ordenlichen Obergheit trüw unnd hold sin: gemeiner Statt unnd Lands Zürich nutz und frommen fürdern / iro schaden warnen und wenden / so ferr ich vermag: ouch iren unnd iren nachgesetzten Vögten und amptlüten gebotten und verbotten / inn zimlichen billichen sachen gehorsamm unnd gewårtig sin: Item die heimligheiten des Synodi verschwygen und nit offenbaren / daruß schad und verwysen möchte erwachsen / alles getrüwlich und on alle gfård / etc

Danåben melde man / das / die nit in Synodum gehörend oder berüfft sind / ußstandint: oder so ettliche / doch ersamme vertruwte personen / begårtind zůzehôren / und es inen vom Synodo nachgelassen / uff glübt der trüw und gloubens getuldet werdint.

[Marginalie am rechten Rand:] 4

[3.4] Nach disem frage man die verordneten von einem ersammen Radt / ob sy neiswas von wågen unser Gnådigen Herren an den gantzen Synodum anzebringen habind.

[Marainalie am rechten Rand:] 5

[3.5] Ze lest soll einer uß den Predicanten ein kurtze ermanung thun / das sich inn der Censura yederman der warheit flysse / one anfächtung nyds und hasses handle / rede und radte / etc Item kurtz erzellen / wie nutzlich die straaf sye / so sy gutlich ufgenommen wirt / etc

[Marginalie am rechten Rand:] Censura.

Hieruf stelle man zum ersten uß die Predicanten / unnd Lectores Theologie / von der Statt / einen nach dem andern. Und Censiere man die mit ernst / glych wie die andern. Fürnemlich das hiemit allerley ambition ouch argwhon der be-

herrschung abgethon / und sy sich als bruder und mitarbeiter im Evangelio Christi erkennind.

Die nachfrag aber in der censura soll erstlich von der Leer / demnach von dem Studio liebe und flyß der gschrifft: item von dem wandel / låben und sitten / unnd ze letst von wågen des hußhabens und hußvolcks gehalten werden. Und wer der stucken angezogen / soll mit warheit was im zewüssen bezügen / es sye gůts oder bőß.

[Marginalie am rechten Rand:] Decani.

Der gstalt sol ouch eines yeden Capittels Decanus ußgestelt / [fol. 225v] werden / damit im keiner eignen gwalt schöpffe / und den wider sine brüder gebruche: sunder / wie mencklich / dem Synodo underworffen sye. Wenn aber der Decanus widerumb heryn berüfft / unnd sinen bescheid empfangen / soll er die naamen der Pfarreren / so ettlich sträfflich gehandlet / gschrifftlich ynlegen. Die söllend dannethin einner nach dem anderen ußgestelt / iro mißhandlung erkonnet / und censiert werden. Hat aber der Decanus ghein klag und mangel an sinen brüdern / soll er das selb ouch mit kurtzen worten dar thün. Nütdisterweniger / das mit der zeit ghein fürhaltens erwachse / söllend zwo fragen von den Presidenten gehalten werden. Die ein. Ob yemands inn disem Capitel sye / der unordnung / mangel / oder unzucht von dem andern wüsse: Die ander. Ob sust yemands da imm gantzen Synodo zegågen mangel und unrächt über yemands dises Capitels wüsse. Und so dann ouch also nützid erfunden / mag man ein ander Capitel and hand nemmen.

[Marginalie am linken Rand:] Des Dachens ampt.

[3.6] Sölichs aber ist dem Decano sines ampts halben bestimpt / das er ein flyssig ufsähen uff die pfarren habe / so im befolhen / das er die zun zyten heimsüche / erfaare was yedes studium sye / was er predgy / und wie es in der kilchen stande. Und so er dann etwas mangels funde / dannethin einen oder zwen der nächsten Pfarreren zü im näme / und den mißhandleden warne / und straaffe / Christenlich und brüderlich / das man da trüw und liebe / nit stöltze und ufsatz spüre. Wo aber sömliches nützid hulffe / soll demnach die selb mißhandlung und verachtung / dem gantzen Synodo antragen werden. [Marginalie am linken Rand:] Caplonyen.

[3.7] Das ouch ghein unordnung / uß mangel der straaff / under den Caplonen und anderen / so der kilchengutern geläbend / erwachse / soll ein yetlicher Decanus die Caplonen / so under im unordenlich låbtend / uff den nåchstvolgenden Synodum betagen / und da dem Synodo die unordnung anzeigen / damit er sines unråchten abgewisen und widerumb zeråcht gebracht werde.

[Marginalie am linken Rand:] Consilia.

[3.8] Nach dem aber die censura / wie gebürlich / volbracht / soll der Presidenten einer anfragen / Ob yemands uß den pfarreren ettwas der leer / irrungen / mißverstands / oder sust kilchenhåndlen halb / nutzes oder schades / habe

anzebringen: denen sol ouch nach vermü/ [fol. 226r]gen / von dem Synodo geholffen und geradten werden. Und was dann einem ersammen Radt züstat / ufzeichnen / unnd innet Monats frist / gütlich fürgetragen / radts und hilff zebegåren. Hierumb bitten wir ouch unser Gnådigen Herren sy wöllind sömlich anbringen Synodi gütlich verhören: nit unserthalb allein / sunder vil mee der gemeinen kilchen halben: ouch angesåhen das sömlichs nit mee dann zwey mol imm jar zeverfertigen kumpt / und aber vil nutzes und güts gebären mag. [Marginalie am rechten Rand:] Welche håndel imm Synodo ze handlen.

[3.9] Das ouch ir ersamm wyßheit / unser censur und håndlen imm Synodo fürtragen / sovil minder bemuygt und beunruwiget: und aber nütdistweniger alle sachen so der kilchen notwendig nit verhinderet: bittend wir hie abermols unser Gnådigen Herren das sy uns doch nit wöllind versperren Ecclesiasticam authoritatem / die verwaltung inn håndlen der kilchen / die uns unnser herr Jesu Christus bevolhen / nit zebeherrschen oder zuverderben / sunder zudienen und ufbuwen. Namlich das der allgemein Synodus fürohin / mit sampt den acht Radtsfründen dem Synodo von einem ersammen Radt (wie obgemeldt) zůgesetzt / in allen denen Articklen / so die leer unnd das låben der Predicanten betråffend / nach form unnd gstalt / wie hierinn vergriffen / unnd wie es die warheyt Gottes vermag / handlen moge / und was da ußgesprochen und verhandlet wirt / vest sye und krafft habe. Was aber nit betrifft die leer unnd das låben der Predicanten / oder daruß erwachsen / sunder usserlich und hierinn nit vergriffen ist / wil sich Synodus gnodt entschlahen unnd nützid beladen. Deßglych wo die gemelten acht Radtsfründ ein handel wie der wåre / für unnsere herren zühen / wöllend wir gütlich lassen beschähen. Dann wir sömlichs nit der meinung begårend / das wir eignen gwalt uffrichten / und uns (wie imm Bapsthumb beschähen) der ordenlichen Obergheit wöllend entzühen: sunder das ein ersammer Radt mit disen kilchen håndlen / nit überlåstiget / ouch so er sust mit anderen håndlen überladen / deßhalb er dise unsere anligende nodt / nit allwåg nach nodturfft verhören mag / doch der leer und kilchen håndlen darzwüschend nützid verwarloset oder versumpt werde.

Aber ze end des Synodi / soll einer uß den Predicanten ein ernstlich ermanung thun / ye wie sich die zyten zutragend: fürnemlich aber das ein yeder siner kilchen mit der leer der warheit unnd gütem byspil sines läbens vorstande / etc / [fol. 226v]

Und in allen disen Articklen / wo sich ein fügklichers / waarers und bessers erfunde / wöllend wir alle zyt der waarheit underworffen sin / und das besser mit danckbarkeit and hand nemmen.

[Marginalie am rechten Rand:] Abred.

Üwer Wisheit underthånige

Verordnete Pfarrer / diener des worts / Låser der heiligen gschrifft / und Diaconi / aller gemeinlich unnd sunderlich uß der Statt und ab der Landtschafft Zürich.

Yetzdan aber so tragend wir üch Unseren Gnådigen Herren dise Artickel inn aller gstalt wie sy verlåsen / inn naamen des gantzen Synodi für: und begårend umb Gottes und der warheyt willen / üwer als einer Christlichen Obergheit / verwilligung hierzů: und damit sy allen zeglych werden mögind / dz ir uns vergünstigen wöllind / dise inn den Truck zeverfertigen / und das sy sovil mee krafft und ansahens habind / söliches mit zûgethoner verschribner bewilligung bewaren / das wöllend wir zû grossem danck ufnemmen / und uns so getrüwlich inn diensten Gottes worts und der kilchen halten / das Üwer Wisheit erkantnuß und danckbargheit erkennen soll.

Üwer Wisheit willige Heinrych Bullinger und Leo Jud.

Druckschrift: StAZH B III 4, fol. 216r-226v; 12 Bl.; Papier, 20.0 × 29.5 cm; (Zürich); (Christoph Froschauer der Ältere).

Edition: Zürcher Kirchenordnungen, Bd. 1, Nr. 59; Egli, Actensammlung, Nr. 1899 (zum 22. Oktober). Nachweis: Schott-Volm, Repertorium, S. 771, Nr. 193; Vischer, Druckschriften, S. 91, Nr. C 216; VD16 Z 585; HBBibl, Nr. 605.

- ^a Korrigiert aus: Satt.
- b Hinzufügung auf Zeilenhöhe von Hand des 17. Jh.?: Sanct Jacob Spanweyd.
- ^c Hinzufügung auf Zeilenhöhe von Hand des 16. Jh.?: Schlieren.
- d Hinzufügung unterhalb der Zeile von Hand des 17. Jh.?: Dietikon.
- ^e Hinzufügung auf Zeilenhöhe von Hand des 17. Jh.?: Zurzach.
- f Hinzufügung unterhalb der Zeile von Hand des 17. Jh.?: Tegerfelden.
- g Hinzufügung auf Zeilenhöhe von Hand des 16. Jh.?: Diacon.
- h Hinzufügung unterhalb der Zeile von Hand des 16. Jh.?: Ramsen.
- ⁱ Hinzufügung auf Zeilenhöhe von Hand des 17. Jh.?: 2.
- ^j Hinzufügung auf Zeilenhöhe von Hand des 16. Jh.?: kind am feld Sant Jörgen.
- k Hinzufügung auf Zeilenhöhe von Hand des 16. Jh.?: Diacon.
- ¹ Hinzufügung am linken Rand von Hand des 17. Jh.?: Vilperg.
- Dies bezieht sich auf einen Passus des sogenannten Kappelerbriefs, der im Anschluss an die Niederlage im Zweiten Kappeler Krieg verabschiedet wurde (SSRQ ZH NF I/1/3, Nr. 151, Art. 3). Diesem zufolge stand es den Gemeinden auf der Landschaft frei, gegen ihre Pfarrer Beschwerde beim Rat zu führen, es lag jedoch im Ermessen von Letzterem, ob und inwiefern er auf solche Beschwerden reagieren wollte.
- ² Vgl. dazu die Ordnung betreffend Ehebruch und Unzucht (StAZH III AAb 1.1, Nr. 2).
- ³ Vgl. dazu das 1530 erstmals erlassene Grosse Mandat (SSRQ ZH NF I/1/11, Nr. 8).
- ⁴ Zu den Schwörtagen auf der Landschaft und den bei dieser Gelegenheit verlesenen Mandaten und Verboten vgl. SSRQ ZH NF I/1/3, Nr. 169.
- ⁵ Zu dieser Ratsverordnung vgl. Bächtold 1982, S. 32, Anm. 41.

15

20

25